

As God jou wêreld skud.

Handelinge 9:1-19

Inleiding

- Soms gebeur onverwagte dinge in ons lewens.
 - Dinge wat ons wêreld skud.
- Jy of iemand naby jou word dalk ernstig siek.
 - Of jy stamp jou kar.
 - Of jy verloor jou werk.
 - Of SARS soek skielik duisende by jou
 - Of oor n tyd word n situasie net n groter gemors.
- As God jou wêreld skud is dit vir 'n rede.
 - Of jy kan net deur hierdie dinge ploeter...
 - of jy kan as Christen besef:
 - God is besig om my wêreld bietjie te skud
 - en dan self regop sit om nie uit te mis waarmee Hy besig is nie.
- Die boek Handelinge vertel juis daarvan.
 - God is nie passief en net aan die gesels met Christene nie.
 - Die boek leer ons hoe God met sy mense 'handel'.
 - Ons sien wat Jesus in en deur sy kinders doen...
 - met of sonder hulle gemak of goedkeuring.
- In Handeling 9 kry ons 'n voorbeeld van twee mense
 - wat deur God geskud word: Paulus en Ananias.
 - Maar God skud nie net om te skud nie...

- ons sien ook hoekom Hy soms so in ons lewens besig is.

[Lees Handeling 9:1-19]

- Ons gaan praat oor:
 - God wat vandag nog lewens skud
 - Die opdragte wat Hy gee
 - Hoe om daarop te reageer

God skud vandag nog lewens.

- Die Christen beweging het Saulus dwars in die krop gestee.
 - As toegewyde Jood het hy soos 'n mal ding met 'n obsessie gelowiges laat vang en in die tronk gegooi.
 - Hy sou dit stopsit!
 - Damaskus was een van die volgende dorpe waarheen op pad was.
- Maar op pad soontoe het Jesus besluit om sy wêreld te skud
 - deur self aan hom te verskyn in 'n helder lig en te sê:
“Saul, Saul, waarom vervolg jy My? Dit is hard vir jou om teen die prikkels te skop. (Hand. 26:14 OAV) ‘Maar staan op en gaan na die stad toe. Daar sal vir jou gesê word wat jy moet doen.” (Hand 9:6 NAV).
- Dan lees ons
 - hoe hy blind geword het,
 - na Damaskus toe gelei is
 - en vir drie dae homself in 'n kamertjie toegemaak het sonder om te eet of te drink.
- Dit is duidelik dat hy tot in sy wese geskok was.

- Die Jesus wat Hy vervolg het, het aan hom verskyn!
- Sy appelkar was omgegooi.
- Alles waarvan hy soos 'n malle oor oortuig was en voor gewerk het, het op die grond gelê.
 - God het Saulus se wêreld geskud.
- Maar Ananias, 'n volgeling van Jesus in Damaskus,
 - se wêreld sou ook skud.
 - Hy kry die onaangename opdrag van Jesus
 - om na Saulus toe te gaan,
 - vir Hom te bid en hom weer te laat sien.
- Saulus was 'n Christen se grootste nagmerrie.
 - Hy het basies vrymag gehad om te doen wat hy wou met hulle.
 - Hy was ook seker die laaste ou wat die Christene daardie tyd gedink het tot bekering sou kon kom.
- Hy rebelleer ernstig:
 - “Nooit nie Here, ek het gehoor wat daardie mal ou aan U volgelingen doen.
 - Hy is hier met toestemming om ons te vang.”
 - My naam is dalk op sy lys.... dis selfmoord!
- Maar Jesus sê net weer “Gaan!”.
- Nou, Ananias was maar 'n gewone ou.
 - Ons het nog niks voor die tyd van hom gehoor nie en ook nie weer na die tyd nie.
 - As ek Ananias was sou my broek gebewe het!
- Hier's die punt:
 - God skud soms mense se wêreld!

- Dit beteken nie noodwendig God is ontevrede of kwaai of die mense word gestraf nie.
- As wêrelde geskud word is God aan die werk.
- Ons het baie keer die gedagte dat
 - God se beloftes van sorg en beskerming
 - beteken dat ons nooit storms of angs of onsekerheid sal beleef nie.
 - Hy is tog daar om ons lewentjies spieëlglad te hou soos 'n groot dam op 'n windlose dag.
 - Soos 'n 'geni' wat uit 'n lampie moet uitkom om vir ons te werk.
 - As dit sleg gaan doen Hy nie sy werk nie.
 - As Hy regtig iets ernstig in ons lewens wil doen
 - sal hy ons sekerlik narkose gee sodat ons tog nie omgekrap of seer kry in die proses nie!
 - Maar dis bog!
- Ons vergeet soms dat Hy, soos in Handeling,
 - steeds besig is met 'n baie groter agenda as ons dag tot dag plesier.
 - Hy is besig om 'n stryd tussen lig en donker af te rond
 - en sy eer en glorie as die Almagtige te vestig.
 - Hierin gebruik Hy ons ook, nes ons in die boek Handeling sien.
- Chistene aanbid 'n 'doen' goed, nie net 'n 'praat' God nie.
 - Dus word wêrelde nog geskud... steeds vandag.
 - Wat Hy wel nog altyd belowe is dat
 - Hy in die storm en angs en onsekerheid jou sal vashou en dra vir sy groter doelwitte.

- Dalk het Hy dit al in jou lewe gedoen
 - of dalk is Hy besig om dit op die oomblik te doen.
 - Dalk is hy daarmee besig in iemand naby jou se lewe.
 - Of dit 'n egskeiding is, 'n finansiële krisis, verhoudingsprobleme, konflik, siekte, werksprobleme
 - of enige ding wat jou bang, buite beheer of selfs seer laat voel.
- God skud soms wêrelde sonder handskoene!

God gee opdragte na sy skudding.

- Maar God skud nie net mense se wêrelde
 - om hulle wêrelde te skud as 'n siek grap nie.
 - Dis asof Hy op dié manier weer 'n mens se aandag en fokus reg en op Hom wil kry.
- So... as Hy geskud het.... wat dan.....?
 - Jy sal sien dat Hy altyd kort duidelike opdragte gee wat daarmee saamgaan.
 - Geleenthede en leidrade om as eerste klein treetjie agter God aan te volg.
- Hy het Saulus se wêreld geskud en toe gesê: *“⁶Maar staan op en gaan na die stad toe. Daar sal vir jou gesê word wat jy moet doen.”*
- Eenvoudige Ananias hoor: *“¹¹Gaan dadelik na Reguitstraat toe en vra by Judas se huis na 'n man van Tarsus met die naam Saulus. ...”*

- Na die skud kom die opdragte altyd.
 - Dis dalk nie altyd in 'n visioen of droom nie,
 - maar na die skudding is dit dalk
 - daardie gedagte wat weer en weer kom.
 - Daardie voorstel of aanbod wat iemand aan jou maak.
 - 'n Oproep wat jy kry.
 - Daardie nuwe mens wat jy ontmoet en jou nooit vir koffie.
 - Iemand wat jy skielik orals raakloop.
 - Een of ander bediening by die kerk wat skielik net reg klink en met jou praat.
 - Enigiets wat gebeur en in jou binnekant voel jy... 'hier roer iets!'.

- Hierdie klein treetjies bring jou ook waarskynlik nie al klaar waar God met jou heen op pad is nie.
 - God sê net eers: Stop die bus...sit jou hand weer in myne en vat hierdie een treetjie in geloof.
 - Kom ons begin weer voor.
 - Kom ons begin weer waar Ek lei en jy volg.

- God skud,
 - kry jou aandag
 - en wys dan saggies die klein treetjies wat jy moet gee
 - sodat Hy weer in en deur jou kan lewe soos dit hoort.

Wees in die klein dingetjies getrou/gehoorsaam.

- Maar jy kan die Here se stille werking in jou lewe weerstaan
 - en jy kan ook die harde geskud weerstaan!

- In Handeling 5:51 'verduidelik' die dissipel Stefanus, 'mooi' vir die Joodse leiers:⁵¹*Julle hardnekkiges en onbesnedenes van hart en ore, julle weerstaan altyd die Heilige Gees; net soos julle vaders, so ook julle.*"
- Saulus was een van daardie mense met wie Stefanus hier gepraat het voor hulle Stefanus met klippe doodgegooi het.
- Dit is hoekom Jesus ook die bekende woorde teenoor Saulus gebruik het: *Dit is hard vir jou om teen die prikkels te skop. (Hand. 26:14 OAV) of 'Jy maak jou net seer deur jou te verset (NAV).'*
- Hierdie woorde van Jesus was eintlik 'n bekende Griekse idioom uit die boerdery wêreld.
 - Ploeg en trek diere is aangemoedig met 'n skerp stok of yster
 - waarmee hulle van tyd tot tyd bietjie op die regte pad gehou is.
 - Soos 'n prodde vandag op die plase.
 - Die diere het dan uit natuurlike reaksie teen die stekels geskop
 - net om dan verder seer te kry
 - en meer reaksie van die aandrywer te kry met die stekels.
- Ons hou nie van die geskud nie.
 - Ons hou nie van daardie eerste treetjies waarop die Here ons wil lei nie.
 - Ons hou nie van oorgee nie.
 - Ons wil nie agterloop dat Hy lei

- terwyl ons eintlik half blind is en nie weet waar ons gaan uitkom nie.

MAAR WAT DAARVAN AS JY VANDAG ANDERS GAAN BESLUIT?

- Wat daarvan as jy vandag sou bid:
 - “Here loop asb weer voor,
 - ek volg tree vir tree in vertroue
 - dat U my kan gebruik.”

 - En as jou lewe op die oomblik nêrens heen gaan nie, en jy niks sien nie:
 - Wat daarvan as jy vandag selfs sou bid: God... kom skud my wêreld!”
- Kyk na Paulus en Ananias...
 - God wou hulle verder vorm en dieper inlei in sy werk op aarde.
 - En dat Hy in
 - Paulus die vervolger,
 - Ananias die niemand,
 - en myself belangstel
 - bly nog steeds iets wat my elke dag verstom.
- Hy het al die rede in die wêreld om by my verby te gaan.
 - Ek is in sonde eerder met en vir myself besig.
 - Maar Jesus het gebid voor hulle hom terreggestel het: “Vader, as U wil, neem tog hierdie lydensbeker van my af weg. Laat nogtans nie my wil nie maar u wil geskied!”
 - Hy het die pad gestap wat ek en jy nie elke dag wil stap nie

- – sonder om te terug te skop
 - en daarvoor betaal dat ons terugskop.
 - Sodat Hy ons weer kan kom haal om daardie pad te leer stap.
 - Waar Hy weer lei en ek weer volg.
- Dit oortuig mens dat Hy regverdig is, maar ook vol genade,
 - en deur Christus my lewe kan en wil kom verander.
 - Of dit nou op groot skaal of klein skaal is...
 - as God skud is dit tyd om jousef om te keer,
 - te bekeer en Hom te volg.

Slot

- God skud vandag nog wêrelde vir sy groter doel.
 - Hy skud soms erg, maar sy skud is 'n liefdeskud.
 - 'n Nader skud.
- Sit regop en gee aandag.
 - Nadat Hy geskud het is daar altyd opdragte en 'n nuwe pad om te loop.
 - Bid en soek die leidrade.
- Volg dit dan in geloof,
 - Net eers tree vir tree
 - waar Hy weer voor loop en jy agter.

Amen

Griffel van Wyk
Trinitas
17 Augustus 2014